

遼州志

目錄

卷之一

圖考

建置沿革

星野

疆域

形勝附

卷之二

城池

山水

學校
學田附

義學田附

卷之三

公署

坊鄉

關梁

郵傳
舖司附

卷之四

祠祀

古蹟

陵墓

寺觀

卷之五

戶口

田賦

蓋法附

兵防

物產

風俗

祥異

卷之六

職官

循蹟

選舉

馳封附

卷之七

人物

忠孝節義附

列女

方伎

仙釋

卷之八

藝文上

藝文下

通志

卷之一

賜時若災祲不興歲歌康阜民無天札是神以福我
公者金福我公之民而民之受福於神者實受福於
我公也因爲之記

重修十龍神祠碑記

張維渠

遼陽八景靈泉居一十龍祠所以祀靈泉之神也其地固勝其關於民事尤切地曷勝乎爾益祠距城東南三十里千畝川之下或曰周宣王二十九年戰於千畝卽此地也岡阜逶迤峯巒幽折上饒古松或盤拏而交結或偃盆而紛披或駁甲而斑鱗或張爪而曳尾下多怪石散者如羊眠者如牛蹲卧者如虎豹平淨者如几案可以敲碁而劇飲窮流遡源則爲靈泉宛若觀瀑布於匡廬不啻聽石鐘於彭蠡拾磴而

登絕巔則爲龍洞之佛刹紅塵滾滾熱鬧塲中忽現
清涼世界真覺別有天地非人間不復作麻姑天台
想也故曰地勝也然則於民事乎何關蓋鄉人遇旱
輒禱雨於祠每歲五月十二日報賽雲集父老時道
故事相傳一母生十子俱爲龍神祠中南向者爲龍
公龍母侍列者爲十龍子夫人而爲神或有之人而
爲龍神其言誕而不經及按古碑記神在唐封通利
侯明洪武七年賜號千畝靈泉之神二十八年賜春
秋致祭迄今因之益無所謂十龍之說然而其說亦

由是可想矣昔先王建邦啟土境內各山大川必祀之以山澤通氣能興雲降雨爲生民利也州之祀靈泉義取諸此後人踵其事因祀而祠之因祠而像之因雨而龍之因龍而神之再加以治水之說則由一以至於十亦無不可者故謂十龍爲靈泉之變相是也若謂別有十龍則非也往年禱雨余嘗從父老取水至泉泉在山腰有石洞如甕口高可數丈餘水匹練而下擇少壯三四人棉衣秉炬用箕辟水梯石相銜而入良久乃出細述洞內狀甫入匍匐數步漸寬

濶行至第二洞水益大如河沿行約半里許始至第三洞黑氣漫漫水聲湯湯深遠益莫可測恍惚若有神物鼯睡其中惡人攪怒而呵叱之者不禁寒慄而髮豎炬亦欲滅不敢復進以瓶注水而返取水還至晚滂沱其雨矣觀此則靈泉爲龍之巢穴猶寢室祠猶行宮也方夫旱魃爲虐點雨如金苟可爲民請命雖瓊其宮瑤其室亦不爲過若聽其傾圯而不爲之所伊誰之責故曰其關於民事尤切也歲在辛亥大興徐公諱三俊以臨汾令報最

特簡來刺吾州甫下車卽切民瘼會旱爰牒立壇禱於城
隍廟拈鬪取水得靈泉焉越日甘霖大澍士民頌公
公抑然曰是神之惠民之福余適逢其會耳其謙冲
讓善如此時北路寒王鎮獨以未雨告公復如前發
牒念方舉於此雨卽零於彼其精誠感格又如此是
歲大熟適公攝篆鄰境他務未遑迨壬子戊祭始到
祠親覽山川之勝一切景物舉不足動公流連惟汲
汲以祠宇傾圯爲懼曰民以農爲天農以雨爲命維
神施雨祠關祀典往沐神惠未有報今犧牲雖脩廟

貌不肅何異操豚肩祝汚邪所挾少而所望奢也爰
進父老與之謀某某鳩工某某庀材勿憚勞僨爾功
勿惜財捐吾俸言未畢父老罔不歡欣鼓舞趨事樂
輸不數月而告竣余聞之曰有是哉公之爲民也方
今

聖天子勵精圖治首重農事建先農壇又

勅封龍神令祀省會無非爲民也如公所行能上體君心

下念民依殆古所稱循良者與將由此條不鳴塊不

破慶有年者大書屢書神之

賜皆公之賜公之德澤
且將與靈泉而俱永云

甕洪山記

張維渠

歲次丙申負笈東遊至甕洪之山一徑通幽兩崖交翠鐘聲鏗鞳古刹翼翼仰面觀天如坐甕中劃然長嘯洪然響應山以故得名谷之窮處有飛崖百丈下覆禪房兩腳不洒壁間開石罅旁蟠石龍狀如吞吐清泉一脉瀉如鳴琴不竭不溢烹茗最甘山僧語余曰是地也盛夏不甚暑隆冬不甚寒汲水門前採樵山上甚便飯黃精採百藥於脩養甚宜境僻人靜花落鳥啼於讀書甚樂余聞之喜遂假榻焉維時序屬仲春節屆清明正值桃腮初綻杏紅方吐

掩映於蒼松古栢間恍如偉人奇士挾妓而遊於是席草
爲茵携琴三弄鶯梭織柳一曲陽春蜂即探花半部鼓吹
景物怡人真覺領畧不盡成然寐遽然覺蝴蝶栩栩又幾
物化莊周矣無何春色漸老夏日濃蔭不衫不履脫帽露
頂或枕石漱流於曲澗之中或抱膝支頤於長林之下或
拾松子掃栢葉於高阜之上遂悠然遐想有出世之思焉
山僧曰山上有棲真洞真人所嘗棲也爾廼乘輿而往穿
林麓履巉岩攀虬龍探虎穴喘凡三息而後至洞深廣可
數丈石壁有古篆文滅磨難識噫是果真人跡邪欲尋嘗

年晒藥鍊丹之處杳不可得但見薜蘿倒掛蒼苔平鋪山
鴿成羣噪翔洞外徘徊者久之覺潮氣蒸人如煙如霧着
衣盡濡山僧曰急歸天將雨歸未半里回首洞口已被白
雲封鎖余指謂僧曰知爾我從雲窟中來乎僧笑而領之
歸來少憩電掣金蛇疾雷碾山萬線風牽滿谷如洗少焉
雲破日出長虹如帶斜控東山下飲溪澗崖上漲來如黃
河之水自天而下佇看潦盡水清又如白練千尋想見匡
廬瀑布之致亦一時奇觀也夏末秋初黃昏日落螢光遍
山點綴幽谷近如石火遠如鬼燐落地如碎金輕篩飛空

如小星亂逸因想古人囊螢讀書撲來數十試之固一字
不可辯也則曷以故迨夫雁字排空菊簪釘地秋風淅瀝
霜紅葉脫四壁啾啾唧唧之聲不絕於耳秋聲賦不能卒
讀矣過此則山空木乾郊寒島瘦西崦牧笛與東山樵唱
相酬答時而長空舞來鵝毛荒林綴以瑞葉不老青山坐
看白頭覺向來身在甕中此時宛在銀缸玉甌內耳一直
雪後讀罷三更更有聲洞然從崖上來墜於窗外驚起視之
龐然一鹿仰視崖上綠光爛爍如雨炬俄而不見僧駭曰
是虎目也逐鹿不得必戀此弗去急移諸門外以絕其患